

頤
道
堂
詩
選

頤道堂詩選卷十四

古今體詩

家曼兄官溧陽署齋有連理古桑一株大合抱數百年物也兄葺其旁屋爲桑連理館舊雨過從者讌集其中錢松壺改七薌爲作主客圖頻迦辛蘿爲文以紀之兄書來索詩爲書一千五十字以寄並示卷中諸子

與君爲兄弟異本如同枝枝枝相糾結葉葉相扶持我昔居里閨君家新橋湄同志三五輩卓犖工文辭騷壇蜚英聲君乃舉其旗傭書佐朝餐負米供晨炊寒士風骨勁遊

子心腸悲東遊齊魯間海岱開襟期山經訪蒙嶧水脈尋
淄維一上黃金臺垂翅南溟歸我昔從琅嬛跳盪同僧彌
君從吳會來籍湜同一師聽雨接吟榻觴月分酒卮清陰
覆筆硯窗外雙桐椅是時海氛惡駭浪驕鯨鯢舳艫高於
山來自安南夷桓桓李將軍拍艦練水犀三省合龍驤五
鎮環魚麗翦燭訪方略羽書晨夕飛泊我入京輦春明攀
柳絲三上不見錄青衫浣春泥君登拔萃科脫手春華擲
殿上試高等落紙鏘珠璣嶺嶠仍客遊文采推文罷海實
盜賊藪籌筆同往時桂管覽深阻花首升厓巖得暇鬯懷
抱佛桑紅海祠我從皖江來黃河潰金隄震驚徐上下盪
決淮東西君來佐制府巨筆揮淋漓三策買讓獻高議韋

丹谷及我來江東旅進慚委蛇君亦繼改官燦爛揚貞蕤
鸞乃鳳之族附君若長離玉爲葭所倚寶君若珣琪君才
本神駿我乃牝牡驪君馥若芳芷我亦蒼葭施君踏鍾阜
雪天闕橫翠微我攬吳洲雲手版對莫釐聚散海鷗狎離
合神龍隨君來官瀨陽五年逮今茲地旣美清淑民亦安
恬熙政成幸多暇餘事舉亦宜舍東古桑樹百年誰所遺
異條實同本瑞牒生華滋其高云百尺其大云十圍朝鳴
雙鶴翔暮宿雙翟羣人言我與君結交相因依我爲謝惠
連君爲賈敦頤蘇氏軾與轍陸氏雲與機此樹兩楨榦鬱
律騰蛟螭頗似我與君蹤蹟無參差辟若奏八音君墳而
我簾辟若染五色君纁而我緇物理有感通我鍼君乃磁

中原論采掇我畚君乃蓄我意竊自喜旣喜復自疑君工
古文章唐宋尋端倪縱橫陋繩尺元氣深肝脾君詩多興
會天葩揚芳菲詭奇託李賀冲澹宗嚴維君長尤在書韻
頗汀州伊墨卿隸法古碑版篆法古鼎彝下逮楷與行祖絲
而宗羲篆刻古絕學刻劃君能爲妙悟在吉金盤匱與匱
鼎近更嗜六法頡頏黃與奚東南此壇坫先後相驅馳卽
今圖中客倜儻兼權奇道暑效河朔高會追南皮一一皆
舊識老大軒須眉西園紀雅集作者郭與施我文非秦漢
詩亦沿陳隋終日手一編餘事百不知東漢班孟堅中唐
韓昌黎虬蟬撼大樹骨力終卑靡近年才更退霜雪空吟
髭禿筆感江淹斷錦嗟邱遲鷗盟志澹泊瘦骨皆清羸舒

雅已告逝

鐵雲

蕭琛亦就衰

樊邨

近得畢公孫

子筠

天馬不受羈

繼起多英彥七子各賦詩

吳嘉淦朱綬沈傳桂章光載王嘉祿彭蘊章潘曾沂諸君

集

我蘭臺聚斲創慙工
偃我昔過瀨水林樹春鳩啼
君方嶺表還縱棹尋西谿
自君宰此邑我已津梁疲
頗似武陵漁路入桃花迷
蹟甘山王削名媿袁伏齊
一官若萍梗浩蕩天風吹
十年不得補八口恆苦饑
高堂矧垂白何以供娛嬉
大府用人才牛從而雞尸
我質等社櫟不中槓與榱
縱抱松柏性不禁蒲柳姿
名場旣若彼宦海復若斯
請從諸子後甘受羣兒嗤
張衡論四愁梁鴻歌五噫
君非脫韉鷹我真伏輓犂
君遇僅如此我遇宜數奇
我欲師老聃知雄而守雌
意更慕屈原餽糟而啜醢
願君崇明德我亦強自

支雞蟲任得失鸞鳳作羽儀扶桑照東海煜煜騰光輝待
捧五色日吐氣凌虹霓

同李子謙別駕李葛峯朱南臺兩大令訪沈忠節公
祠墓於山塘詩以記事

山塘紅樹晚煙昏訪墓人來弔夕暝斬國夫妻餘破廟卞
家父子賸孤墳滄洲故壘埋秋草瀛海新祠隔暮雲擬勒
豐碑表忠節東明太史有遺文

將勒全謝山太史
神道碑文於墓

仲瞿來自袁江宿余蘭臺聚齋話舊有感鐵雲之亡
書寄樊邨婁東

君從淮浦挂帆來我亦滄江縱棹回湖海所傳諸作者乾
坤之內幾人才鄭虔老去餘三絕杜甫吟成感八哀且與

西窗聽秋雨燭花紅影照深杯

謝文節公古琴歌

黃沙落日悲燕臺
疊山曾後文山來
城南古寺夕陽暮
我到疊山殉節處
老圃鋤地深復深
疊山身後餘一琴
入燕當日定攜此
猶是趙家舊桐梓
中有滄桑一片心
激盪宮商翻海水
眼前突兀曹娥碑
天荒地老將安之
卻聘書成志早定
乞歸未肯同琴師
正氣歌中激雷電
文山有琴吾未見
他年倘過水西莊
題詩還訪橋亭硯

玉峯舟夜聽雨

黃葉玉峯寺紅蓼沙河渚
獨客不成眠坐聽孤篷雨
沉沉數更籌悠悠感行旅
微聞沙岸雁一聲戛柔艣

題傅青主山霜紅庵遺詩

蒲輪非爾志歸臥舊山林詩有幽人意而兼孝子心孤雲
飛渺渺古瑟靜悄悄讀竟霜天曉秋聲不可尋

婁東阻雨

昨宵聽雨玉峯路今夕聽雨婁江城婁江城郭煙水窟年
來潮緩淤沙停篙師斂手阻舟楫遵陸首問劉河程無端
風雨橫畱客萬木飛葉鑿秋聲燭花黯黯夜寂寂坐聽溼
鼓譙樓更我行復向滄海去長風萬里孤帆征古人屺岵
每多感稔我屢涉風濤行王事靡盬逾十載宦海狎浪閒
鷗輕故人哭間不可見憶我定對寒檠明歸來與誦邠宣
議江南水利關農耕

婁東龔安節先生祠

先生諱詡字大章號鈍庵父訾給事中以直諫戍
五開戍時詡方三歲隨母王依外家訾歿勾補軍
伍族人保持之行金得緩年十四補遼陽衛建文
閔詡直臣子調守金川門年二十一靖難兵至谷
王穗以門降守者奔詡奮戈不中走郊外龔一當
顧宮中火起乃大慟變姓爲王大章遯歸里時大
索亡至任陽馬陳二氏匿詡大困中詡卽困中讀
書間夜渡婁江省母索益急族人瑀復隱爲計厯
二十餘年賣藥授徒人盡知王大章卽龔訾子詡
也傷其志無告者宣德七年周忱籍田江南聞之

具禮訪謫謫條便宜二十事民以爲便母卒詔已
班白號輒絕人之忱薦署松江太倉鎮海學衛學
教授不應忱躬請泣然曰謫老兵仕無害但負往
日城門一慟耳忱歎息去無子築逸老庵虞浦上
獨與一老婢居破廬中有田三十畝種豆植麻歌
詠自得每及先朝事悲不勝年八十又九卒卒時
整衣冠端坐誦大學而絕有白氣起屋上門人謚
曰安節先生隆慶間卹錄壬午諸臣撫臣張佳胤
疏請得特祀祠在七鴉浦上

靖難師下無援兵九江豎子開門迎門前一卒慟哭去至
今史傳亡其名豈知原是直臣子家有諫書畱國史直臣

之子作忠臣卹勞僅免榆關徙南都雉堞高崔巍除是燕
子能飛來九門礮火正血戰一夜忽見城門開城門開燕
師入將軍笑門卒泣旣無國士之劒力士椎亦不能白棒
臥道同老羆一慟自爲君父耳天荒地老將安之詔書名
捕急張儉復壁著書藏趙岐韓康賣藥婦孺識夏統奉母
風濤悲脫身亡命二十載幸免方黃景鐵同誅夷文襄開
府知君名薦君教授君不行二十餘事世稱便大儒經濟
歸蒼生逸老庵中婢腳赤七鴉浦上白虹白野史人稱王
大章門人私謚龔安節

同作

蕭掄

脫身虎口金川門潛身米廩虞陽卹百年論定終廟食

祠堂肅肅英風存先生本是直臣子給事封章著前史
荷戈身死五開營勾補軍書還幾紙惠王追念老臣賢
詔許孤兒勿戍邊抱關擊柝書生事得住長安恩亦偏
一朝燕兵渡江至金川城門手親閉谷王迎降可奈何
慟哭投戈從此逝我聞鐵尙書死守孤城節不渝又聞
方正學與血螭頭甘受斲瓜蔓十族競捐生烈烈殉義
多公卿先生乃是一門卒遭變原無死事責失聲一慟
櫻兒威詔書名捕受追迫當時不死爲老親後來不仕
爲故君平生大節在忠孝鴉邨父老猶能云我來採得
蘋蘩供身世淒涼爲君慟衆人遇我尙如此可惜惠皇
不大用

劉河阻風戲題寓樓壁

江海勞生夢未關
愁風愁水此河干
鮑家樂府真多事
題破人間行路難

寓樓無事取鐵雲瓶水齋集加墨一過書寄仲瞿

墨澹豪枯錦字灰
掃空凡豔見奇才
看山遠入蠻天去
橐筆親從鬼國來
宦海蒼茫畱我讀
騷壇風氣讓君開
江東餘子王郎在
一樣驚心有別裁

十八先生墓詩和鐵雲集中作

按明桂王去廣西走貴州孫可望處之安籠所卽
今興義府也無人臣禮從臣吳貞毓張鐫周允吉
楊忠徐極蔣乾昌李元開李順朱議臬鄭允元趙

賡禹蔡續易士佳胡士瑞朱東旦任斗塘等憤甚
與內侍張福祿全爲國謀遣林青陽之滇南諭李
定國共圖可望內監馬吉鞠黨于可望以事洩可
望使鄭國王愛至安籠考訊十八人同日遇害時
人哀之收遺骸瘞於城外之西山麓題其墓曰十
八先生成仁處

漢傑美圖像唐賢蔚登瀛古來忠義士各自成功名明季

兩都破桂藩實宗盟轉戰走黔滇翊戴皆豪英孫恩本賊

黨

孫可望本張獻忠部將

餘勢殊驕盈擁衆旣跋扈挾封尤狎憐何

瞿已前死

何騰蛟死於湘潭瞿式耜死於桂林

殘局悲基枰嚴公生裂麻楊

公死結纓一爲段秀實一爲武元衡

嚴起恒阻可望秦王封楊畏知以冠擊可

望皆爲所殺

董卓入長安侯景登臺城稔此龐馬輩

謂龐天壽馬吉翔兩

內黨逆如颺颺拒畫甘一死古郎殊硜硜

馬吉翔使郎中其品畫堯舜

受禪圖獻可望不從爲可望杖死

危亡在旦夕天柱誰支撐晉王較忠義

謂李定國

粵西播先聲密詔召入衛員外甘請行

謂林青陽

一相矢

忠義諸賢扶危傾豈知天意去志氣空咿嘯多魚實漏師

駢戮無遺嬰惡豎既賣主悍帥方擁兵得一已足亡稔此

二患并白虹貫精氣碧血埋忠誠至今北關外墓樹表賜

塋後來益播遷天波稍鐸鐸死緇四十餘賢奸混主名銅

駝晉南渡白馬唐東京古來興亡際節士殊觥觥沸鼎炮

鸞鳳烈火燔瑤瑛我讀馬場碑太息悲填膺

歸甫兩旬復有渡海之役祈風碧霞元君感題祠壁

劉河水落暮潮平一雨瀟瀟百感生
滄海更番成驛路青山何日築詩城
關津浩蕩鷗無侶雲水蒼茫雁有程
願乞靈風共來往高堂遠夢憶孤征

風大不得渡海泊舟新鎮寄宿賣漿者家

連朝坐小樓今日臥孤舟
大海風橫捲長江水倒流
龍驤人莫羨鷁退我何求
閒共屠沽語何勞萬戶侯

醉題賣漿者壁

莽莽風沙撲面寒慙來質廡
古河干此間或有英雄在
我輩原同逆旅看斷甃豔銷埋
玉冢殘罍醉問舊軍墮新泥
雪壁留鴻蹟照我題詩月一丸

新鎮旅夜登飛虹橋望海上月

霜華吹冷鷓鴣裘醉踏紅橋板上遊寒月破雲生海角夜
潮驚雨響船頭僮奴劇飲忘身世逆旅畱題自倡酬憶煞
西溪三畝宅可憐漁隱勝封侯

連日東北風甚大不得渡海逆旅獨坐作此自嘲案
頭適有鐵雲詩因效其體

行不似西城賈胡宿不似桑下浮屠稔我江海久涉歷此
行濡滯母乃迂一阻婁東雨油衣代瓦屋漏巖再阻劉河
風落葉打屋桑條枯已登海舟出海口掛帆竟欲凌天吳
豈知靈隱橫作虐異軍時起蒼頭驅我旣非赤壁登壇周
公瑾東風燒退曹公艚又非大澤牧羝蘇子卿北風勞寄
河梁書倉皇轉舵避三舍來船如馬驕天衢去得順風來

者怨解頤妙論聞髯蘇且將好語慰僮僕流行坎止安故
吾坐擁重裘尙瑟縮寒氣憐爾生衣裯譬如本作此間客
得錢且飲黃公壚嗟我涉世亦云久年來所遇多齟齬衣
食坐困苦我志關河行役勞我軀名士畫餅語可噉宦味
啖蔗詞尤虛卽今蹤蹟困窮薄簡書畏我徒嗟呼何人勸
我行不得牆外一聲山鷓鴣

次夕月色更佳寒亦殊甚旅舍靜玩不能成寐詩以
述懷卽書家書之後凡一百八十字

明月何多情夜夜照孤客霜華逼窗牖水痕潑階石此際
滄海上凍雲極天碧長風東北來餘響勁寒沙迢迢吳閶
城高堂念行役月輪若明鏡照見華髮白弱弟依邴下扶

將永朝夕雲端嘆征雁計程數水驛還念閨中人清輝攬
圓璧兒女話行旅飛鴻感蹤蹟一孫在襁褓黎棗頗解索
定復憶遠人月華指東壁豈知行路難五日阻海舶行期
尙未定歸期豈能擇溝水互東西浮雲自南北惟有天上
月遠近都不隔明發寄家書薑芽拙波磔傳語說平安麗
娃鄉畔宅

宦海歎海上阻風作

我本宦海人今來滄海上所往輒多阻所遇皆一狀十載
奉明詔眞授久無望八年賦閒居心力瘁捫揣上有垂
白親甘旨艱轉餉妻孥八九人衣食十指仗僮僕依不去
溫語藉挾纊朝朝府中趨梵筴聽騶唱暮暮府中歸案牘

問宗匠非遇公孫宏故人不相諒便逢謝宣明面目故相
向跬步生荆棘平地起巖障劒戟利口舌城郭深肺腑張
超五里霧王愷十重障何物是名德當代此卿相招隱桂
樹秋作宦梅花瘴冰難夏蟲語海任非蛙謗飽厯宦海境
無風駭依浪不若泛滄溟天地其清曠如何亦相阻長風
勢豪宕生平天柱峯骨傲神亦旺胸襟萬里寬氣象三山
壯叱馭吾亦能徑渡豈相讓巍巍天后宮金支錫靈貺巖
巖海神祠雲旗開詆蕩來朝定登舟及此秋潮漲封姨有
悔心布帆或無恙猶勝宦海中沿緣乞依傍他年三徑歸
吾慕陶元亮

舟中口號示同儕者

駭浪何須問舵師安心兩字鎮相宜待他到岸收帆日便是風恬浪靜時

十五夜瀛洲對月

前月月望孤帆飛明月送我渡海歸今月月望樓船開明月遲我渡海來海上冰輪幾圓缺今夕明輝尤皎潔月氣如煙復如水月華非冰亦非雪從來月色圓時好三五佳期歌窈窕如何恰向異鄉看唱煞銅弦惱公惱願月照愁復照歡願月照雙休照單從今碧海團圓影莫使紅閨獨自看

寄王仲瞿卽書煙霞萬古樓集後

萬古煙霞有此樓冷紅何處種殘秋招魂鶴市淒涼夢失

意龍門汗漫遊詩好祗緣長作客才奇原不稱封侯馬塍
雲樹駕湖水期爾南歸買釣舟

戲書仲瞿金陵謝玉孃詩後

秦淮流水六朝香秋影簾櫳說謝孃散髮斜簪名士態亂
頭纔服美人妝黃繩入道中山第青眼憐才大道王我已
維摩消結習空花吹過鬱金堂

寓齋聽雨檢案頭殘帖得杜牧之書張好好詩意臨
一過卽書其後

海上飛雨來沉雲壓天黑虛牖峭風勁敝裘寒氣逼案頭
數尺紙隨意弄殘墨我懷杜樊川才名動京國經濟掩詞
賦悲憤託聲色淮南歌吹地輕薄藉口實原衛與罪言才

略竟誰識卽如好好詩淪落亘胸臆何異白香山琵琶感
遷謫女子悲誤嫁才士恫失職古今盡如此讀史心惻惻
鴉頭與紫雲何足累明德更憶杜棕傳投筆三太息風急
雨轉麤寒斂歸鴉翼

崇明懷古

何年翠蜃吐樓臺天賜長沙此地開石匣不勞雙鳳出翠
華親見六龍來香銷月觀餘殘繡玉瘞春山弔落梅閒向
金鰲峯頂望趙家往事不勝哀

長崎島控小流虬竟使鯢鯨作隊遊東事舊聞平秀吉西
沙正對薩摩洲鴛鴦誰演三奇陣蝴蝶橫飛萬斛舟獨有
唐衢能死國蒼涼殘碣墓門秋

明嘉靖中東倭犯境
知縣唐一岑戰死

勝朝遺事說諸公兩度懸師百道攻曾見張侯來海上

張謂

名更聞鄭伯在軍中

調鄭成功

礮聲遠落排衙鎮烽火遙連漲

水洪不是黃童妙籌策誰將奇績佐元戎

邑人黃初緒佐總兵梁化鳳守城

誰遣孫恩作水仙紛紛海上起烽煙聽談太尉鏖兵日

謂李

壯烈伯長庚

更憶龍驤破敵年

謂王軍門得祿

久已滄溟銷戰伐漫勞

門戶守戈鋌琅嬛舊事吾能記籌筆瀛舟十載前

後神珠引元旦夕海上見珠光作

戊辰歲攝篆吳淞聞父老言巨蜃吐珠之異曾作

神珠引以紀之實未見也今以承乏來崇明崇明

與吳淞相隔百里一水相望海上屢見珠光見則

數日內必有風雨余以今丁丑元旦之夕見之其
色紫赤上燭霄漢倏忽開闔不可名狀其光若此
珠之大不知凡幾蜃之巨更不知凡幾也考之志
乘唐武德中海上巨蜃吐氣成紫雲卽有漲沙名
以天賜實爲崇邑所自始又近與趙都督言海舟
篙師長得見之見光而已不見珠與蜃也謂之野
火見則二三年中其地必有漲沙成沃壤焉屢驗
不失余惟物之久者必有靈氣旣司風雨又吐沃
壤崇之民千餘年以生以長皆蜃之功律以功德
禮宜廟食因作後神珠引以紀之並述其功德以
待崇之民思報饗焉

曜若旭日升，晷華旒若夕。月舒丹霞，又如豐城劍氣燭牛
斗，復似涿鹿雲蓋騰芝葩。父老來觀歎靈異，云是神珠吐
光氣。此珠潛伏，始何年論古，忽思唐代事瀛洲。片壤昔本
無巨蜃，噓吸驚天吳。不吐樓臺吐平地，至今千載成名區。
橫海將軍罷傳箭，親向樓船夜中見。一夕驚看陸渾焚，三
年待築浮山堰。或云主雨兼主風，是司膏澤驅魃露陽侯。
海若各疆理，天池豈獨潛神龍。我昔停橈淞口渡，聞與老
兵談古戍。八龍去後一珠閒，餘光夜燭吳淞路。今來瀛海
大，吉昌奇蹤又見神珠光。今夕元夕一歲首，調和玉燭呈
珠囊。聖世懷柔神，率職功德在人宜。廟食擬建琳宮近
碧霞，光芒萬古生顏色。

擬建蜃姥祠
於天后宮側

春日郊行

細路潤平沙雨餘聞早鴉板橋臥春水茅屋背桃花叱犢
人初出迴鑣路轉賒耕桑心事在光景惜春華

寄題嚠城秦氏清芬榭

何處清芬識舊家樊川水榭最清華行魚過檻圓波散沙
鳥窺簾落日斜淮海文章君抱膝江湖蹤蹟我浮槎懷歸
易作西溪夢十畝漁莊萬樹花

芳樹怨

女子季芳樹不知何代人永樂大典載其刺血詩
一章語極酸楚悱惻殆焦仲卿妻流亞矣詩云去
去復去去悽惻門前路行行重行行輾轉猶含情

含情一回首見我窗前柳柳北是高樓珠簾半上
鉤昨爲樓上女簾下調鸚鵡今爲牆外人紅淚沾
羅巾牆外與樓上相去無十丈云何咫尺間如隔
千重山悲哉兩決絕從此終天別別鶴空徘徊誰
念鳴聲哀徘徊日欲晚決意投身返手裂湘褰裾
泣寄藥砧書可憐帛一尺字字血痕赤一字一酸
吟舊愛牽人心君如收覆水妾罪甘鞭箠不然死
君前終勝生棄捐死亦無別語願葬君家土儻化
斷腸花猶得生君家此詩紀曉嵐尙書槐西雜志
中載之云在韓蘄王女孫詩前則芳樹或宋人也
君不見廬江少婦名蘭芝唱想夫憐怨姑惡至今孔雀東

南飛又不見寶涓之妻蘇若蘭迴文織錦能迴心朝雲惆
悵陽臺寒彼美人兮季芳樹不知生何年家何處惻惻五
字詩使人讀之悲掩嫫南山有鳥北山羅西流之水東迴
波昨日匣中玉今日陌上花紅顏身世嗟如何羅袞瑟瑟
秋雲裂繡紋纈纈殘痕滅畱得當年決絕詞字字心頭眼
中血枯桐不死生蘭芽樓前芳樹啼早鴉種樹須種連理
枝莫教開作斷腸花

朱將軍

勛斗

佩刀歌

將軍黔人官川北鎮總兵教匪自秦延蜀將軍屢
戰有功會魁倫攝四川總督旣撤嘉陵江防兵又
以將軍所部兵借支口糧扣餉不給羽檄促戰將

軍率飢兵深入中伏死事聞 賜卹如例子某蔭
騎都尉納貲爲部郎官京師與野雲山人敘宗盟
之誼以將軍佩刀爲贈前年山人攜來吳門見示
屬爲此詩書寄山人都下

山人示我一佩刀云是黔西將軍之所遺將軍朱姓名射
斗猿豹身手熊羆姿列校積功至大將天都非絡軍聲馳
三苗逆命始辰澧白蓮徧地開參差飛燕白箭紛賊壘棘
門潮上聯軍麾將軍所部號敢戰銀刀如雪淬鸛鵒梓潼
太守數霍峻涼州上士推姜維此刀當日身所佩十年戰
血同淋漓黑雲都走白波帥西南保障清邊陲何來節度
此開府蒲桃酒熟金畱犁已撤防兵縱賊渡江流浩浩悲

風吹賊氛環逼急烽火軍租推算窮毫釐但知僅豎合溫
飽豈識士卒方瘡痍人無朝餉馬無草羽書催戰嚴軍期
畱贊悲呼作鼓吹周處慷慨從軍司重圍轉戰蹈絕地橫
刀想見悲歌時有尸未許裹馬革殘戈斷戟沙場悲或云
長槍大來衆詭譎負襁馱入飢民飢囊橐棄道誘我衆拔
刃還向軍披靡將軍馬健先士卒後軍不繼繼者誰單馬
夜叩太平寨欲呼民屯爲援師豈知屯寨亦賊踞積怨所
部多誅夷踞迎將軍置高座生祭再拜進酒卮大臣豈敢
進鋒刃將軍奚用生還爲蛇鄉虎落已深入一死報國其
奚辭少遲辱身卽辱國韓刀吐氣騰虹蜺努力自刺腹透
背賊衆萬刃戕其屍傳聞異詞待考定公之忠義天人知

此刀軍府列蘭錡銅鑲龍雀生光儀流傳輦下入江左傳
觀如握生蛟螭我欲激昂表忠烈媿非韓柳工銘詞拔鞘
復納三太息古今烈士恆如斯願君寶藏莫輕棄忠魂夜
嘯驚魅魍珊瑚擊碎將星墮酒酣更讀嚴生詩幾岷沓沓
望不極暮雲萬里昭忠祠

嚴麗生有弔川北
鎮朱公戰死詩

題曹墨琴夫人寫韻軒圖卽呈惕甫先生

不圖質廡漢梁鴻不寫移居晉葛洪
偕隱神仙曾日下大家詞賦重江東
遙知甲帳懸初月應識文簫拜下風
今日新橋河畔過青山眉黛夕陽中

紫玉墓

娃宮秋老女墳涼惜抱成煙事渺茫
鳳去秦臺春寂寂鶴

歸吳市夜荒荒埋香易誤瓊姬墓夢月曾迷玉女廟擬築
叢祠鄰茂苑萬花紅翠擁明璫

春夜偕姬人蘭君乘月渡海卽寄湘姬吳門

滿天星斗一帆懸好趁春潮夜放船江寺疎鐘雲外動海
門明月鏡中圓定知翠黛窺龍女應有明妝儷水仙憶爾
麗娃鄉畔住燭銷香燼不成眠

劉河聽雨書寄樊邨

又聽劉河雨瀟瀟響夜闌戍樓沉夜拆襖被警春寒載酒
期佳夕弦詩待古歡婁東好春事多恐百花殘

朱梅如冢

在太倉茜涇鎮南一里相傳朱高宗自崇渡婁有

梅妃侍輦道卒葬此今呼宋朝墳

南遷車駕已倉皇尙有昭儀侍尙方
五馬渡江攜翠黛六龍浮海擁紅妝
定知婉嬋人難再可惜嬋媛命不長
婁水清冷弇山碧蘼蕪滿地竟埋香

太清樓圯紫筠摧狼藉花枝盡可哀
玉塞風塵當日去金鑲消息幾時迴
東京烽火銷黃土南渡湖山賸綠苔
帝子揚舲應有恨海門風雨翠華來

姓梅人卽是梅花小影分明萼綠華
碧海魂歸猶有冢青城人去已無家
定聞詩識灘浮嶼憶共仙舟港渡蝦
底事雲容先入地江天惆悵玉鉤斜

我來海上弔蛾眉細雨丁香酹一卮
幸免宮車同北狩曾

聞簫鼓葬西施東風花謝劉娘冢明月春寒繡女祠一樣
傷心天水碧紅羊劫後又題詩

和作

蕭掄

倉卒宮車避寇時君王海上葬蛾眉花愁月慘風塵暗
鳳泊鸞飄粉黛悲漢殿綺羅終寂寞吳宮簫鼓益淒其
可憐落葉哀蟬曲猿鵲沙蟲共此期

宮腰如柳鬢堆鴉海畔淒涼侍翠華有夢尙思金屋貯
埋香便當玉鉤斜千秋精衛沙頭鳥一樹棠梨陌上花
欲採白蘋弔湘女秋墳鬼唱總堪嗟

當年北狩慘雲鬢翠輦香車竟不還一代紅顏龍漢劫
幾堆青冢浚稽山得畱故國原僥倖便瘞孤邨亦等閒

愁絕六龍南渡日珠襦玉匣定蕭閒

海外劉妃尚有莊

崇明有宋劉娘娘莊

一般玉貌侍君王內家宣

勅黃麻重

宋制內夫人主勅書

別殿書經墨瀋香

高宗御書石經倦卽劉妃代之

薄命早辭行在所承恩長讓奉華堂趙家金碗人間出

回首西湖隧道荒

土已婁東桴亭修楔有懷樊邨甘亭適誦淵明詩用

集中遊斜川韻

陽春和宋玉暮雲懷湯休故人不可見獨爲池上遊天桃
發淺渚垂楊蔭平流微波聚行魚和風戲羣鷗緬懷亭中
人高蹈臥陵邱幼安定吾侶仲連非爾儔西望玉峯客儼
若倡與酬夏峯與二曲可得同君否歸來還獨酌茲詩聊

寫憂日晏望不極開經遲羊求

城東桃花

細雨溼桃花春林啼早鴉林間數遊屐花外見人家碧重
溪頭柳紅輕水面霞獨吟芳渚上惆悵此年華

李繡子大令將涉海訪余崇明遇於婁東連夕翦燭
話舊書此送歸吳門卽答見贈之作

餓鴟啣鼠嚇鵝雛干將缺折芳蘭鋤不作相如上林賦去
讀司空城旦書乘興訪余滄海上邂逅適願權中途歲月
非昔容鬢改六年往事空嗟吁君本嶺海舊詞客玉堂揮
翰追歐蘇無端一謫墮塵世三年同綰禹陽符 九重有
詔問海運與君翦燭談河渠上書大府不見納故紙空飽

千蟬魚此地朱張故廬在遮洋帆影銜舳艫婁江春水通
六國馬頭卽在城南隅明季勞臣沈忠節破家輓粟充天
庾瀛海祠廟我新作君詩和我如吹簫桃花細雨春城孤
君行轉棹還東吳沉沉良夜百事無願君且復畱斯須

原作

番禺李黼平繡子

西湖作長逢人說一渡朱崖歎奇絕檳榔自喫茱萸簪
遺韻流風殊未滅豈如海縣三佩綸

君前攝寶山常熟上海皆海置也

崇明更在滄波間鄉分蟠木作庭樹人指方壺爲屋山
禹鐵滄涼初上日大冠偶爲班春出南窮溫處北登萊
眼底煙濤幾籌筆朱張舊據孤嶼家功在轉漕趨京華
連檣銜尾四百萬齊放此間仙景沙黃龍青雀搖旗旌

蒙衝載有遮洋兵卽今形勢屹巨鎮藩蔽不使堀身輕
太平焉用橫海將竹使分符倚公望泉客綃衣出水來
烏夷卉服占風嚮近日河淮蒙帝力連雲芻粟飛天
上成山故道吹巨浪迴颶瀉入胸懷壯海外文章開自
娛懸知放衙一事無鶯花時節公酒熟每念上客常招
呼客中潦倒無過余方讀司空城旦書官船戔戔泊天
墟一帆願假歸扶胥

贈畢靜山

憲曾

婁江春水綠生波一卷高吟共嘯歌王謝家風喬木在杜
韓門徑古人多廬陵金石今餘幾

尊甫潤飛先生收藏最富

蘇邁文章

更若何正是客懷無賴甚茶煙燭影共消磨

鶴梅館詠王文肅公手植古梅

梅耶鶴耶其孤山之雲壑耶鶴耶梅耶其赤壁之綯衣羅
浮之蒼苔耶昔宰相之舊家今羽人之幽宅期雪霽兮月
明佇寒香兮高格

偕畢靜山過南園懷樊邨玉峯

當代詩人宅前朝宰相家軒窗皆灑落門第自清華池暖
魚吹絮林香燕語花相期話明月幽抱詠蒹葭

薛澱湖古劒歌

雍正中有農家居薛澱湖側其子偶於湖底得一
劒瑩銛異常有人欲以緡錢易之翁不售也一日
翁他出適有鐫農器者過其門其姬不知以鐫一

耜識者惜之然銛利猶逾於他器婁東沈敬亭有
詩紀事蕭君樊邨爲余誦之感其事因繼聲焉

薛澱湖中古神劍不識前世誰氏之所遺得毋干將莫邪
竝時鑄復自何年棄此湖之湄吳鉤錦帶昔誰佩曾否斷
截犀象剗蛟螭亦旣下墮九淵底便當養晦如伏雌何以
一旦誤落豎子手宜其刈葵補履靡不爲老翁識汝頗似
晉雷煥未甘棄汝如敝錐豈知劫火避不得彼邨姬者奚
所知鑄爲農器縱鋒利惜汝千辟萬灌非常姿大才小用
乃如此劍如有知能不心傷悲不然藏鋒斂鐔有深意寧
逐畎畝遨以嬉我讀南華悟說劍深爲露才揚已勤箴規
神龍變化縱不測何如君子藏器而待時嗚呼懷才之士

宜知之

訪吳梅邨故宅

寒香零落盡人說舊梅邨詩卷長終古滄桑不可論空山
悲短褐破屋感清門有約花開日重來酹一尊

郊行

陳蹟問如何春華感逝波落花芳樹少新筍竹林多漁父
攜簪立邨農叱犢過東臯懷舊約歸興寫婆娑

書汪劒潭司馬詩後有感船山太守之亡

疲驢踏徧落花泥明月樊川又竹西落魄青衫重有感銷
魂紅袖半無題不教徐樂依金馬終遣王褒訪碧雞愁絕
齊名說張祐山塘斜日暮雲低

道中卽目

晚春氣候換陰晴陳蹟勞勞媿此生
麥隴碧翻春浪緩菜畦黃弄夕陽輕
樓船正議津門戍畚鍤方環海上城
嗟我悠悠感行役田禽頻送竹間聲

李硯香浮海餉牡丹余次日復有婁東之役

一帆春色到瀛洲十種天香萬斛舟
滄海浮天原浩渺名花傾國自風流
題襟池館尋高會修禊園林憶舊遊
我與芳華仍小別淒江煙月更勾留

聞津門新設水師書事

析津左掖達神京重鎮初開細柳營
橫海遠勞荀勗將伏波新設水犀兵
樓船礮火喧鯨穴瀛島旌旗接鳳城
寄語

天西小勃律朝宗珍重識郵程

劉河登韓蘄王將臺

此地韓王舊將臺建牙當日戟門開定知滄海樓船出聞
道金山戰鼓催南渡河山盡風雨西湖宮闕亦蒿萊祇今
畫角陳兵處不共銷沉付劫灰

今爲閩兵臺

松壺自梁溪來爲余作花海扁舟畫卷竝題詩云夜
深夢踏湖上月煙深不見湖上山湖山漠漠同一
色疑入玉壺非人間老蛟千尺忽盤屈翠羽幾雙
時往還欲借逋翁亭子上臥遊十日掩柴關詩旣
清峭畫尤澹遠賦此酬之

鶴睡無聲樹陰綠曉枕微吟花海曲有客夜渡芙蓉湖午

窗爲作花海圖花海在何處乃在西溪西梅花繞溪不知
數花間翠羽無驚啼花海有田亦有屋花海有池更有竹
白魚肥美燕筍香此地卜居良不惡黃姑澹冶秦亭橫七
十二峯秋月明花時見花不見月勞君寫我扁舟行鄧尉
吾未遊羅浮我曾夢夢裏縞衣來扣門揮手冰絃作三弄
漁莊偕隱同行藏圖中還乞寫孟光何年一棹徑歸去約
君來醉花源堂

妙巖臺

是梁公主墓相傳梁武帝女出降郡人孫瑒此地
卽其故宅今爲錢氏息園

江北昔尋定林寺江南今見妙巖臺南朝愛說蕭家事北

渚曾看帝子來埋玉土香春燕識雨花天遠夜烏哀女墳
湖接瓊姬墓一樣荒涼弔綠苔

合肥定林寺亦有梁公主墓

讀謝梅莊侍御

濟世西北域記

謝公真慷慨志欲效朱雲魂遇歐刀赦書經劫火焚玉關
終返骨青海久從軍桂嶺梅花瘴茫茫日易曛

瑰奇西域記神異北荒經海市萬重樹河源幾點星名王
分白霄活佛奠金瓶想見題名處昆侖一角青

偕湘姬至劉河祈風碧霞元君祠下次日曉起渡海

用前蘭姬渡海韻

又見春帆海上懸鏡奩琴匣上樓船長風幸比前番穩明
月仍畱昨夜圓綠樹吳淞尋遠夢

姬曾偕余之寶山吳淞近寶山郭三里與劉河

相望碧霞靈嶽話真仙閒情吟向滄溟上驚起蛟龍夜不眠
海上夜靜聞龍吟

名場宦海兩浮沉如此遨遊亦素心已歷關山看虎蹟更
從滄海聽龍吟

壓浪樓船海上迴軍門笳鼓響如雷水犀十萬橫磨劍誰
譜霜天曉角來

貝闕珠宮過一生長吟何事不平鳴飛騰伏蟄尋常事休
學潛虬作怒聲

餘響殷殷遠更傳詩情滄海浩無邊昨宵夢訪蘇門隱間
聽鸞皇嘯九天

湘姬鐫小印曰曾經滄海余爲賦詩

曾經滄海難爲水此境生平第幾回我爲無聊隨牒去爾
因何事泛槎來青天鸞鳳窺妝鏡碧漢魚龍捧玉臺應有
高吟寄蓬島扶桑東去浪花開

自北沙渡海歸

渡海一帆輕歸程卽去程犢行蘆岸遠鳥下麥田平綠樹
聽殘雨青天玩晚晴停驂問耆老相與話農耕

瀛洲樂府

崇明爲巖疆亦古邑也俗尙勤儉有唐魏之遺風
顧地大物博民氣剛健智者好訟勇者好鬪有海
蠻之諄矣余以承乏至此觀覽志乘見忠烈孝弟
貞節之事不絕於書文采風流相望也擇其事之

可昭激勸者作爲樂府十四章俾讀者興復古之思焉曰瀛洲以洪武初有東海瀛洲之褒也

十三啓 浦惟盛字宜中明正德中以薦擢寧王宸濠府教授濠懷不軌惟盛連上十三啓以諫王怒脅之自縊

靖難遂建國宗藩皆效尤寧濠氣桀驁陰謀矧是淮南流王府教授誰稱旨賈傳董相何者是小臣連上十三啓王怒脅之臣請死海內文章李北地藩府宴歸矜得意方撰陽春書院記

耆民兵 明嘉靖中倭寇之亂邑人施珽率衆與戰屢勝號耆民兵卒以深入中伏死後諸生顧國

樊穢繼之亦稱耆民兵云

東倭入寇無堅城誰其破之耆民兵耆民兵誰所領西沙
義士有施珽戰城南死城北馬革裹屍烏啄肉普救寺東
建祠祀野老吞聲婦子哭同時樊顧皆有聲所部亦號耆
民兵

割袍袖 施之炳字元度崇禎時巡撫張國維署
爲參軍以二千人破老猢猢二十萬衆於皖署川
西道拒張獻忠割袍袖寄弟自刎死衣冠墓在吳
郡清流山

賊犯皖江擾屬縣二千衆破二十萬桓桓經濟施參軍保
障江南奇績建一擢滇南收再監川西軍賊來月薄不知

數壯氣激盪凌秋雲晝夜血戰還死守力保危疆志不就
故鄉有弟識我衣戰血淋漓割袍袖袍袖寄歸人戰死馬
亦悲鳴殉知己不見衣冠墓在清流山袍袖戰血埋爛斑
督海運 沈廷揚字季明崇禎中以諸生督海運
洊至光祿少卿魯王監國浙東加兵部侍郎以水
師至鹿苑舟膠被執死於金陵所部六百人皆死

國朝賜諡忠節

中原多故艱餉餽臣請破家通海運七年海運天庾充一
再加秩旌臣功天崩地裂九廟圯臣請破家募死士百艘
亦可成奇兵誰奪舟者劉澤清走滄洲戰鹿苑舟膠於沙
臣力竭身不可降頭可斷故人休唱松山哀六百義士同

歸來

蹈海死 黃銘丹字丹侯邑諸生先爲史可法參謀繼謁沈廷揚於淮上沈令至崇明募水師廷揚入舟山銘丹知事不可爲蹈海死妻施氏亦殉節海上義士黃丹侯遠從閩部來揚州揚州無功至淮浦期與沈公圖大舉佐公治軍事爲公募水師淮東西地分四鎮水師雖募公言歸眼見江山人事改一死甘心蹈東海閩中烈婦亦殉節海上秋濤白于雪

六卦股 石蘊奇鍛工性至孝母病六卦股人無知者母死母族人誣以不孝控於令驗得實乃懲誣者而獎蘊奇

石蘊奇業鍛工性孝弟人所同母多疾醫縮手工不知醫
知有股工不知股知有母一割再割至五六心亦可瀝肝
可剖匪人怨乾餼構獄至官府刀痕斑斑亦可數不是匪
人構官府誰知孝子六割股

衣裾結 茅氏元左丞朱清子婦朱虎妻清敗家
籍沒氏沒屬太醫提點欲娶之氏與二子衣裾連
結以死自誓清故舊鳩金贖之歸居尼寺不食死
翁先作賊後作官海上六國通番船翁旣獲罪夫亦死舉
家戍邊沒妻子妾年方艾好顏色醫師檢點思娶妾妾顏
如花心如石二子相從衣裾結贖歸終爲練行尼絕粒以
死甘如飴旌表墓廬付史館至今言者心吁嗟吁嗟乎良

玉抱璞蓮出泥無源亦有醴無根亦生芝君不見節婦茅氏女朱清子婦朱虎妻

不奉佛 宋氏郁世宰妻年二十八夫亡守節以終性不奉佛曰男子而事佛是不知父母爲佛也女子而事佛是不知翁姑爲佛也吾自有佛在何以佛爲其知大義若此

男子而奉佛何如奉父母女子而奉佛何如奉姑舅吾自有佛何佛爲此言頗似韓昌黎誰知大義乃若此吁嗟節婦一女子

光祿歸 張氏沈廷揚妾廷揚殉節金陵張氏扶櫬葬虎邱置祀田四十畝廬墓終身每風雨作至

墓前哭而招之曰光祿歸來妾在此行道皆泣

光祿報國妾佐家光祿殉國妾廬墓虎邱山前土一坏光祿昔年埋骨處寒潮悲嘯下海門西臺朱鳥同招魂風雨淒淒悲不止光祿歸來妾在此

花軀隕 王野塘妻熊氏寶山人從夫館崇明倭難作夫婦奔竄遇賊王被刃仆地熊急以身衛賊繫之欲相犯不屈而死王逾時而甦事聞於官咸致賻奠兵備道任環弔以詩曰清血流天地花軀隕甲兵野塘巖下士一日遂知名野塘名度

花軀隕甲兵清血流天地誰其賻者趙提學誰其旌者尙御史倭寇來夫婦走衛夫以死熊烈婦前明嘉靖歲癸丑

任公作詩在人口黃絹幼婦外孫齏臼軀可隕名不朽

三畝田 俞氏漆匠女適農家子年十九夫死父
欲嫁之氏曰我有田三畝紡織足度日叔生子可
嗣奈何以此事相勸父怒乃自縊

有田三畝足度日叔子可嗣願已畢耶娘何事苦相逼寢
室燈殘鼠窺戶妯娌家常話晴雨明朝畢命朱絲繩農家
子婦漆工女

鵝照影 黃氏諸生徐宏泰妻夫亡守節教子成
立年五十九卒先是氏畜二鵝雄早死雌於氏死
日照影水中悲鳴不食亦死人比諸玉京燕云

鴛鴦有羣雁有匹宛宛雙鵝白于雪雄死雌悲鳴似妾中

夜腸斷聲爾鵝鳴莫悲妾亦甘獨處影隻形復單相看吾
與汝未亡人去鵝闌珊水中照影鳴夜闌明朝鵝死舊庭
院人說當年玉京燕

祭遺文 秦氏貢生開谷女事母至孝通書史工
文翰字徐汝聽未婚守節撫諸姪有恩皆呼爲母
哀汝聽之賁志歿也輯所爲文置一器每祭祀則
陳而哭之里有徐貞女請從授書曰女子在德不
在才傳經非閨閣事也卻之

母學如宣文母才如道蘊夫也賁志入黃泉未忍遺文付
灰燼春霜秋露白玉杯天荒地老黃金臺古來失意盡如
此紅顏憔悴青衫哀寂寞文章緘一器一語端嚴明大義

女子在德不在才傳經亦非閨閣事

誓不字 梅氏文秀女有至性父歿母觸棺求死

氏方三齡亦絕粒不食每哭母女齊聲哀動行路
及長病母無依誓不字資紡績養母以終

父死母存女亦孤三歲黃口啼呱呱母存女嫁母誰倚女
也終身甘不字古有嬰兒子今有梅氏女九龍山下唐素
霞七十全貞奉邁父與爾芳名各千古

移池上竹種小庭前書三絕句

偶移池上竹來向庭前種涼影入疎簾湘煙澹秋夢
疎花依野竹移竹兼移花似我攜雙玉來浮海上槎
高士峭風格美人好眉嫵天意惜芳華一夜瀟瀟雨

喬生鷺洲自上海來過余署齋話舊

斜日戀江樹晚雲橫海城挂帆秋浦遠繫纜暮潮平池竹
煙中密林花雨後生舊遊話淞月一水已盈盈

舟山宮井篇

弔明魯監國元妃陳氏也順治辛卯王師下滬洲
張名振奉監國以舟師搗松江冀分兵勢使蕩湖
伯阮進安洋將軍劉世勛居守兵敗議分兵先送
宮眷然後背城一戰先是監國妃張氏渡海爲張
國亂兵擁去妃監於此謝曰願得死此淨土城
破整簪服再拜投井死義陽王妃杜氏宮娥張氏
從焉錦衣指揮王相內臣劉朝歎曰眞國母也相

與昇巨石填之卽共到其旁而死董戶部守諭作
宮井篇哭之乙未英義伯阮進再下舟山訪得妃
死狀卽其井封之立碑致祭表言於監國加諡貞
妃丙申舟山又被陷其碑被仆全謝山集中有舟
山宮井碑文因書其後

黑雲壓日沉虞淵璧月敲碎義和鞭殺后烈后竝死國宮
史所紀垂千年後來海上魯監國厥妃陳氏心貞堅鯤身
鰲背從帝子螭灘蜃窟嗟嬋娟舟山城破以死殉井中水
例凝寒泉先是監國次於越張妃主政父弄權是何國家
何助戚清識遠鑒明且賢亂兵劫掠昧所向精衛碧海何
時填亦如南都選后軍府去梅邨樂府悲琴弦孤舟萬死

脫虎穴驚魂午夜啼蛟鬬貽書女兄敘艱苦琅琦健跳幾
播遷一死久定終遂志貞心古井同皎然蘭香妃子去碧
落麗華宮女從黃泉始平表節加正謚江都紀事銘新篇
至今鐘磬汨潮汐殘碑何處尋遺堦君不見唐藩入閩號
隆武延平自撒籬與藩曾妃先從洛神去九瀧流水聲濺
濺又不見桂藩南走入緬甸降王賣主迎輜輶白虹共騰
碧血瘞蒼山洱水悲啼鵲招魂萬里有同志雲旗翠葆來
徧褰漢井一角玉璽缺梁苑百味金瓶全陳宮亦有景陽
井劒血終染青溪邊太史文章弔沙社高文最屨何時鐫
我拾遺聞亦未竟宮闈大節銘海天古來興亡在史冊趙
家往事同煩冤楊后從子身蹈海厓山風雨沉樓船滄桑

之際每如此青燈弔古悲長編

雨後池上

小池殘雨過一徑溼蒼苔萍葉隨潮長藤花臥水開簾波
待新月樓角送輕雷散髮斜簪地真宜濁酒杯

和王仲瞿海上雜詩

渤海

不知冬夏不知春何處天涯可問津萬里蒼茫絕龍漠一
槎安穩寄鷗身吐來蜃氣應成市織出鮫綃定有人兩賦
傳鈔誰最好

木華
張融

不曾親歷總非真

文登山

青山高下接河濱曾竝文儒述所聞博士有書議封禪秀

才無事學從軍種瓜水冷離宮近采藥船遙衆島分絕頂
登高愁極目空尋遺蹟話紛紜

羽山鯀城

黃能白馬問前身九載餘功屬替人自有海民修羽廟竟
無國史紀勞臣竊來息壤心原苦化作河精事恐真文命
辛勤終底績千秋功罪論誰申

秦東門李斯刻石

扶桑對面迤朝霞四海爲家闢九關已築長城到西極更
臨渤海署東門神山舟遠滄波闊日主祠遙暮靄昏咫尺
蓬萊青一點求仙應有未歸魂

之罘山經秦皇宮下

之梁山近成山麓尚有秦皇舊日宮萬世傳無碑石古六
王畢已劫灰空燕齊方士談迂怪楚漢諸侯論戰功一樣
叢祠留馬蹟阿廢辛苦效狂侗

馬蹟山有
隋煬帝廟

田橫寨

全齊形勝莽蒼蒼猶有餘風攬八荒彭越已歸誅可懼酈
商相見媿難忘稱孤今已公然帝亡虜何勞大者王五百
英雄同毅魄祇應潮汐汨扶桑

漢武帝望仙門

武皇內傳紀紛紜西母班龍降夜分已建睢祠迎寶鼎更
開蹕觀舍神君金人掌上垂垂露石臧封中縷縷雲終古
望仙仙不至茂陵何處弔秋墳

備倭城

薩摩洲上水連空並海當年事戰攻祇爲東溟求貢市遂
令南國起兵戎竄餘關白驕天外縛取飛黃在算中記得
五侯同盡日颶風一夜佐成功庚申夏阮中丞平艇匪於
松門獲安南進祿侯俞貴
利其大統兵寶
王侯等沒於海

戚少保墓

海雲莽莽擁遺阡踏秋潮弔墓田無復鴛鴦兵什伍空
勞貔虎士三千防倭海上橫戈出破虜邊頭枕甲眠一卷
新詩百回讀六韜辛苦著當年

蓬萊閣

紅闌如翼碧螺旋有客登臨愴百年此地名山稱高閣相

看碧海接青天往來萬里征帆小
淘洗千秋石子圓欲起坡公談海市
古來多少誤求仙

蜃樓海市

率堵朱甍隱碧紗忽看樓櫓戰塵譁
分明彈指空王境彷彿遊仙玉女家
放眼欲窮三島路賞心思探十洲花
也知轉瞬煙雲過猶勝流蘇夢九華

丹崖奇石

海山遊記儼方壺絕勝長江萬里圖
天以此間穴鸞鳳人言其下種珊瑚
蓮花九朶雲中立玉女三峯畫筆摹
說到奇觀都歎絕也緣遊者古來無

泛海玩月舟自彈窩出洋長風乘興
直抵長山諸

島

涼霄挂席趁風恬無復當蹊駭馬銜
明月當空秋影澹滄波無極暮潮
鹹幾時歸去憐雙照何處懷人寄
一函莫向夜分吹鐵笛恐驚星斗落孤帆

鼉磯小泊自珍珠門放櫓中流觀日月竝出

蛟龍驚夢不成眠碾出雙輪水底天
終古地毯浮不去本來海水望無邊
屯雲盡作魚鱗色化羽真成鶴背仙
若向大郎山頂立紅赭碧靄更紛然

原作

王 曇 仲雅

江北江南遊盡春茫茫一粟到迷津
神魚擊水狂生事小鳥銜沙細女身
外海七奇曾有志撐天一柱竟無人

當初誰賦三千字祇覺陳言不切真

渤海

文山南望逆河濱颶母風來不可開聚議且無秦博士
伏波能有漢將軍中原地偏長城短海外天寬島路分

一扇帆竿風八面古來防守最紛紜

文登山

欲全唐祚婁亡身一輩同流有四人功在八年名父子
死能一怒定君臣書傳堯典渾難信尸副

入聲

吳刀必不

真豈有元魚人化獸中天寃案未曾申

羽山
縣城

長城一面飲朝噉又噉滄瀛關一關中國果然秦萬世

相公能免蔡東門祖龍文字真奇僻牽犬功名太老昏

欲取蒙恬新不律重書三字與招魂

秦東門李
斯刻石

王朗欲除秦帝廟江南亦有始皇宮燒書恰是英雄伎

血祭何年俎豆空一統能懲周失計長城足與禹同功

江東吳越間至今有禹秦二皇廟讀三國王朗傳知合祀已久古來暴主聰明事也有

微勞利後侗

之界山經秦皇宮下

康公城畔露蒼蒼閒抱山經讀大荒齊有諸田同日盡

楚畱三戶勿能忘豈無淵藪逋逃地誰是扶南不死王

寄語受降城外客古來鯁海有滄桑

時廣南多艇賊卽安南黎氏之部屬

也田

橫寨

神仙富貴兩紛紜人莫聰明過十分老去英雄多諱死

古來臣子半欺君毋寧好色汗青史且勿長生笑白雲

尙有望仙門子在蓬萊山是武皇墳

漢武帝望仙門

百萬邊儲庫鉅空漆城豈許寇來攻士無勝國盧忠烈

地有奇才威總戎名將何曾能好死

謂胡忠憲

婦人也要在

軍中翠翹畢竟奇男子到底收成大功

備倭城

蓬萊小縣有荒阡少保松楸少祀田官帑不過糜十萬

南兵只要將三千籌燈肅法中軍靜鑿鼓吟詩萬馬眠

莫笑輕裘勤著述老生紙上有多少年

戚少保墓

赤闌干外一回旋往蹟心傷此十年好景可容含淚笑

人間原有盡頭天

李斯書此三字於文登山

愁城兩所筐羅大窮海

三周栲栳圓聞道神仙笑凡骨可能凡骨換神仙

蓬萊閣

無端兩目冒紅紗二十八天雲欲譁未必青天逢鬼市

安知海外沒人家如看好畫開心孔眞住迷樓必眼花

豈是仙山身不到總嫌池館太繁華

蜃樓海市

丹崖石壁畫難摹好幅橫長赤壁圖朱劬雷傳眞良嶽

石崇敲剩古珊瑚補天材料精華在全蜀山川縮本摹

欲遣米顛來一拜洞天清品似渠無

丹崖奇石

船又平平浪又恬城樓三鼓月初銜身疑列子風難御

水比西湖味少鹹從古無人遊赤壁中流有島是殺函

北宋守備之地魚龍不阻狂奴興再有颿颿借半帆泛海玩月舟自彈窩

出洋長風乘興直抵長山諸島

小泊鼉磯不得眠紅光燒熱蔚藍天秦人避世桃源裏

伊尹乘船日月邊問俗已離頭痛國先日患頭痛登山眞勝

肉飛仙當時枉讀楞伽典直渡重洋始惘然鼉磯小泊自珍珠門

放櫓中流觀日月放出

夏日招客飲署後月林花泊精舍風雨驟至用韋蘇

州集中郡齋雨與諸文士燕集韻

南屏松檜陰西冷荷芰香夢想不可見綠樹生微涼十年
客郡齋寢興池上堂佐人理案牘遑問斯民康宦此忽數
月舊事疇能忘睠我二三子旨酒聊共嘗綺紵交誼金
玉聆報章仰視青天雲鴻鵠思飛翔惜無登樓眼遠矚東
西洋海上對風雨寂寞司巖疆

周采巖爲余作禪悅小影題詩其後

海山何事策紅藤彌勒同龕得未曾消盡凡心味禪悅年
來已是在家僧

細讀華嚴證我聞天花散後靜無塵畫師錯會維摩意徧

寫龍華會上人

天上因緣終散雪
人間眷屬亦揮沙
欲除煩惱先除戀
不種西天稱意花

僧樓半杵夕陽鐘
夢裏南屏翠色濃
更乞蒲團摹小影
萬峯寒翠一林松

夜起渡海

枕簟帆檣託臥遊
疎星殘月在孤舟
五更夢醒閒無事
臥聽潮聲入海流

婁東寓館夢醒聞雨有憶

暝臥微涼生夢覺
雨聲響檐溜鳴階
除枕簟自蕭爽
言念鹿城客林陰息吳榜
雨止殘月出期予理雙槳

曉過漁墩同樊邨池上觀荷

一轉漁墩曲池荷漸作花與君若鷗鷺此地有煙霞別浦
尋僧院長橋間酒家西湖三十里鄉夢上歸槎

輓沈春蘿

故鄉諸畫史我識沈東陽昨過吳門市言歸舊草堂湖山
終寂寞風雨更荒涼欲檢殘緋讀秋燈感夜長

袁浦畱殘臘虞山別早秋戟門珠履散畫舫玉琴收落落
名場驥茫茫宦海鷗不堪中歲事逝者感應劉

葑溪舟中待雨

落葉滿吳船斜陽響亂蟬雨聲先到樹雲氣欲浮天殘暑
消林外新涼到酒邊農歌知閔雨彌望盡秧田

奉和仲瞿見題新刊拙集之作卽用原韻竝效其體
百改千刪轉自疑深嘗甘苦定無奇雲萍風絮原多感塞
月江花各有宜何日神方換凡骨當年刻意畫燕支近來
漸得蒼茫意西漢文章北宋詞

少年寥落又中年造化何堪著意鐫敢望選樓三十首樊

述隨園嘗自歎其詩曰可得三十首耶謂入選也何妨剩橐二千篇余詩三千餘

首尚餘二千乾坤落落誰同調今古茫茫各自傳李杜以前曹

陸後幾人姓氏日中天

作詩辛苦刻詩難何幸全家五集刊今年余刊頤道堂詩選後並刻舍弟壽熊

紅蕉館遺詩兒子裴之澄懷堂詩子婦汪端自然好學齋詩姬人管筠小鷗波館詩彩筆果然干氣

象錦囊各自嘔心肝名場磊落三生石宦海浮沉七品官

何日西湖載歸舫葛仙祠畔乞金丹

原作

王墨仲瞿

必傳兩字有何疑不遇桓譚不道奇五本自書長慶在

一編傳到谷渾宜

君在京師與朝鮮李光稷有倡和之作在武林節院送行之什趙介山修

撰李墨莊中翰爲攜至琉球

詩從而後人難做紙向將來貴不支五

百注韓干注杜大家燒卻別填詞

予與舒丈皆擬以詞曲度老今舒沒而予

也僅存

崇寧刻到政和年直與昭明宋版鐫孔子舊經三百首

謂碧城舊刻斷不可廢

放翁新樣九千篇翻空齊魯韓毛說不許

蘇黃李杜傳從此陳陳詩世界安排鎚鑿另開天

如來結集待阿難劉向傳經馮道刊半世功名甘刻格

百年心血苦雕肝
文能壽世須三寫
身是傳人老一官
多少古人皆不死
一編原是古金丹

頤道堂詩選卷十四